

**VCD Tamil 'Najib Harapan Masyarakat India' Diedar Di Seluruh Negara
Bernama
27 April, 2013**

KLANG, 27 April (Bernama) -- Sejumlah 1.5 juta keping VCD berjudul "Najib Harapan Masyarakat India", mula diedar ke seluruh negara sejak semalam.

VCD mengandungi program-program yang dilaksanakan Perdana Menteri Datuk Seri Najib Tun Abdul Razak untuk masyarakat India di negara ini sejak April 2009 hingga sekarang, diterbitkan oleh Dewan Perniagaan dan Perindustrian India Malaysia (MAICCI).

Pengedaran VCD itu adalah bagi membantu kempen Barisan Nasional (BN) pada pilihan raya umum ke-13 (PRU13), kata Presiden MAICCI, Datuk K.K. Eswaran.

Pelancaran VCD itu berlangsung pada konsert hiburan anjuran MAICCI di sebuah sekolah tamil di sini malam tadi, yang turut dihadiri calon BN bagi kerusi Dewan Undangan Negeri (DUN) Seri Andalas, T. Mohan.

Eswaran berkata VCD berdurasi 3.9 minit itu menerangkan sejarah kemerdekaan negara dan juga semua usaha yang diambil Najib bagi menyelesaikan masalah yang dihadapi oleh kaum India di negara ini.

Sementara itu, Mohan yang juga Ketua Pemuda MIC berkata pihaknya telahpun menggerakkan semua jentera BN untuk mengedarkan VCD itu dari rumah ke rumah.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=945614>